

# DECLARATION

*1640*  
*27.7* DV ROY, *2<sup>e</sup> fait en 12.*

Portant prolongation du terme,  
pour le conuertissement des  
especes d'or legeres en especes  
d'or de poids, iusques au der-  
nier Decembre 1640.

*Verifiée en la Cour des Monnoyes le vnzième  
Octobre 1640.*



A PARIS,

Chez SEBASTIEN CRAMOISY, Imprim-  
meur ordinaire du Roy, & de la Cour des  
Monnoyes, rue saint Iacques,  
aux Cicognes.

---

M. DC. XL.

AVEC PRIVILEGE DE SA MAIESTE'.

Case

F

39

1326

1640fsp

THE NEWBERRY  
LIBRARY



**DECLARATION DV ROY,**  
*portant prolongation du terme, pour  
 le conuertissement des especes d'or de  
 poids, iusques au dernier Decembre  
 mil six cens quarante.*



**L**O VIS par la grace de  
 Dieu Roy de France & de  
 Nauarre. A tous ceux qui  
 ces presentes Lettres ver-  
 ront, Salut. Pour remedier au mal qui  
 s'estoit introduit dans l'exposition  
 des especes de monnoyes d'or, tant  
 à nos Coins & Armes, qu'Estrange-  
 res ayans cours en nostre Royaume,  
 lesquelles se trouuoient tellement  
 defectueuses, alterées & rongnées,  
 que la plus grande partie n'excedoit

la moitié de leur iuste prix , Nous auons par nostre Declaration du dernier Mars dernier ordonné, que toutes les especes d'or legeres qui auoient cours en nostre Royaume, seroient conuerties en especes d'or, de poids nommées LOVIS , & que trois mois apres la publication de nostredite Declaration, toutes lesdites especes d'or legeres demeureroient décriées , sans qu'elles peussent estre exposées, ny receuës en aucuns lieux de nos Estats, & qu'elles seroient portées en nos Monnoyes, & changées en monnoyes pesantes; Et pour soulager nos Sujets, nous nous ferions chargez, tât des fraiz de la fonte, que des salaires des Graveurs, Oüuriers, Monnoyeurs, & autres Officiers , & en outre aurions quitté & remis nostre droict de Seigneuriage à cause dudit conuertif-

sement, esperans que pendant ledit temps de trois mois nos Sujets porteroient ce qu'ils auoient desdites especes en nostredite Monnoye, & que le conuertissement en seroit fait; Neantmoins ne s'estant pendant ledit temps porté que peu desdites especes legeres en nostredite Monnoye, on n'auroit peu fabriquer vne assez grande quantité de Louis, pour le change & remplacement desdites especes legeres; ce qui nous auroit obligé à continuer & prolonger par autres nos Lettres de Declaration du vingt-neufiesme May dernier, ledit temps de trois mois pour ledit conuertissement, iusques au dernier du present mois de Septembre, pendant lequel la plus part de nos Sujets n'ayans pas esté plus soigneux de porter lesdites especes legeres à ladicte Monnoye, il n'auroit encore esté

suffisamment fait desdites nouvelles  
 monnoyes; en sorte qu'il est necessai-  
 re de prolonger le temps, & donner  
 nouveau delay pour paracheuer le-  
 dit conuertissement. A CES CAUSES,  
 del'aduis de nostre Conseil, & de no-  
 stre certaine science, pleine puissan-  
 ce, & auctorité Royale, Nous auons  
 par ces presentes signées de nostre  
 main, continué & prolongé, conti-  
 nuons & prolongeons ledit temps  
 pour ledit conuertissement des espe-  
 ces d'or legeres, en especes d'or de  
 poids, iusques au dernier Decembre  
 prochain, pour tout delay; EN IOI-  
 GNONS à tous nos Sujets de porter  
 en nos Monnoyes du Marteau, & du  
 Moulin de nostre bonne ville de Pa-  
 ris, ou entre les mains des Changeurs  
 pour ce establis suiuant nos Ordon-  
 nances, lesdites especes d'or legeres,  
 pour estre conuerties pendant ledit

temps en especes d'or de poids; apres  
lequel temps toutes lescdites especes  
d'or legeres demeureront decríees,  
les declarant telles des à present,  
comme pour lors, & defendant à  
toutes personnes, de quelque qualite  
& condition qu'elles soient, d'en ex-  
poser ny recevoir en aucun lieu de  
nostre Royaume, & pour quelque  
cause, & souz quelque pretexte que  
ce puisse estre apres ledit temps, sur  
les peines portees par nostre Decla-  
ration du vingt-neufiesme Mars  
dernier. FAISONS des à present tres-  
expreses defenses à tous les Officiers  
comptables de nostre Cour & suite,  
de faire aucuns payemens desdites  
especes d'or legeres, à peine de con-  
fiscation d'icelles; & en cas qu'ils s'en  
trouuent chargez, voulons qu'ils  
les portent es lieux susdits pour  
estre conuerties, sçavoir les Ecus

d'or legers ; en autres Escus d'or  
 de poids , & les Pistoles en Louis ;  
 Et pour faciliter ledit conuertisse-  
 ment, & donner plus de commodité  
 à nosdits Sujets de changer lesdites  
 especes d'or legeres, dont ils se trou-  
 ueront chargez, Nous voulons qu'il  
 soit estably vn Bureau en chacune  
 des villes de Lyon, Bordeaux, Thou-  
 louze & Rénes, esquelles sera porté &  
 enuoyé à nos fraiz, nombre suffisant  
 de Louis, pour les changer & distri-  
 buer à toutes personnes qui y porte-  
 ront desdites especes legeres. Et d'au-  
 tant que iusques à présent nous a-  
 uons supporté les fraiz de la fonte  
 & du brassage de ce qui a esté fabri-  
 qué desdites especes de Louis, & qu'il  
 n'est raisonnable que ceux qui par  
 auarice & auidité de gain, ont gardé  
 lesdites especes legeres, soit pour en  
 abuser, ou les exposer au poids, ou  
 autre-

autrement avec aduanrage, ne s'é-  
 stant mis en aucun deuoir de les faire  
 conuertir pendant les delais portez  
 par nos precedentes Declarations, se  
 preualent desormais de ceste grace:  
 Nous voulons & entendons que dès  
 à present, comme à l'aduenir, lesdits  
 particuliers qui feront conuertir des  
 especes d'or legeres en Louis, payent  
 les fraiz de la fonte & du brassage,  
 ensemble du change, selon & ainsi  
 qu'il sera réglé par nostre Cour des  
 Monnoyes, conformément aux Or-  
 donnances, & comme il s'est touf-  
 iours pratiqué en pareil cas, lequel  
 Reglement sera inseré en fin des im-  
 primez, qui seront publiez des pre-  
 sentes. Et pour empescher les abus  
 qui se commettent es especes mou-  
 lées, faites par faux Monnoyeurs  
 qui en exposent iournellement à  
 cause du gain qu'ils y trouuent, les

faisant passer au poids confusément avec les bonnes, lesquelles especes moulées sont de plus bas tiltre que les vraies Pistoles d'Espagne, s'étant trouué par les essays qui en ont esté faits iusques à la valeur de deux carats de perte, qui reuiennent à trente-deux liures sur chacun Marc, Nous auons fait & faisons tres-expresses defenses de les exposer à peine de confiscation, & des amendes & peines portées par nosdites precedentes Declarations; Voulons que lesdites especes moulées soient portées en nosdites Monnoyes, pour y estre affinées & rendues au tiltre des bonnes Pistoles d'Espagne, & lesdites especes payées à ceux qui les y porteront selon leur iuste valeur, suivant l'essay qui en sera fait en presence des Commissaires. Et quant aux Escus d'or rongnez & legers, qui

font de plus haut tiltre que leſdits Louis, voulons qu'ils ſoient portez dans ledit temps & delay cy-deſſus en noſtre Monnoye au Marteau, pour y eſtre conuertis en eſpeces d'Eſcus d'or de poids, ſuiuant nos Ordonnances en la maniere accouſtumée; Et ſeront les Piſtoles d'Italie legeres receuës eſdites Monnoyes, & affinées au tiltre des bonnes Piſtoles d'Eſpagne, pour eſtre conuerties en Louis avec leſdites Piſtoles d'Eſpagne. SI DONNONS en mandement à nos amez & feaux les gens tenans noſtre Cour des Monnoyes, que nonobſtant le temps des vacations ils faſſent lire, publier & enregiſtrer ces preſentes, & le contenu en icelles garder & obſeruer ponctuellement, nonobſtant oppoſitions ou appellations quelconques, deſquelles & des dif-

ferens qui pourroient naistre en consequence, Nous leur auons attribué & attribuons toute Cour, iurisdiction & connoissance, & icelle interdisons à tous autres Iuges. MANDONS en outre à tous Bailifs, Seneschaux, Preuosts, Iuges, leurs Lieutenans, & tous autres Officiers qu'il appartiendra, d'y tenir la main : Car tel est nostre plaisir. En tesmoin dequoy nous auons fait mettre nostre scel à cesdites presentes. **DONNE** à Chantilly le vingt-septième iour de Septembre, l'an de grace mil six cens quarante, & de nostre Regne le trente-vniesme. Signé, **LOVIS**. Et sur le reply, Par le Roy, **SUBLET**. Et scellé du grand sceau de cire iaune sur double queue.

Et sur le reply est encore escrit.  
*Leuës & registreés es Registres de la*

*Cour des Monnoyes, ouy & ce requerrant le Procureur General du Roy en icelle, suiuant & aux charges portées par l'Arrest de ce iourd'huy unzième iour d'Octobre mil six cens quarante.*

*Signé,*

DE LAISTRE.

---

*EXTRACT - DES  
Registres de la Cour des  
Monnoyes.*



Eu par la Cour les Lettres de Declaration du Roy, données à Châtilly le 27. iour de Septembre dernier, signées LOVIS, & sur le reply, Par le Roy, SVBLET, & seellées de cire iaune du grand seel sur double queue; par lesquelles sa Majesté, pour les causes & confide-

rations y contenues, a prolongé le  
 temps pour le conuertissement des  
 especes d'or legeres, en especes d'or  
 de poids, iusques au dernier Decem-  
 bre prochain, pour tout delay. Et  
 enioint à tous ses Sujets de porter en  
 ses Monnoyes, du Marteau & du  
 Moulin de Paris, ou entre les mains  
 des Changeurs pour ce establis, les  
 especes d'or legeres, pour estre con-  
 uerties pendant ledit temps en espe-  
 ces d'or de poids; apres lequel temps,  
 toutes lesdites especes d'or legeres  
 demeureront décriées, avec defences  
 à toutes personnes de quelque qua-  
 lité & condition qu'elles soient,  
 d'en exposer, ny receuoir en aucun  
 lieu de ce Royaume, & pour quelque  
 cause & souz quelque pretexte que  
 ce puisse estre apres ledit temps, sur  
 les peines portées par la Declaration  
 du trentevnième Mars dernier, & à

tous les Officiers comptables de la Cour & suite de la Majesté, de faire aucuns payemens desdites especes d'or legeres, à peine de confiscation d'icelles; & en cas qu'ils s'en trouuent chargez, ordonne sad. Majesté qu'ils les portent es lieux susdits pour estre conuerties, sçauoir les Escus d'or legers en autres Escus d'or de poids, & les Pistoles en Louis: Et pour faciliter ledit conuertissement, & donner plus de cōmodité de changer lesdites especes d'or legeres; veut sadite Majesté qu'il soit estably vn Bureau en chacune des villes de Lyon, Bordeaux, Thoulouze & Rennes, esquelles sera porté & enuoyé à ses frais nombre suffisant de Louis, pour les chāger & distribuer à toutes personnes qui y porteront desdites especes legeres. Et d'autant que iusques à present sadite Majesté a supporté les

frais de la fonte & du brassage de ce qui a esté fabriqué desdites especes de Louis, & qu'il n'est raisonnable que ceux qui par avarice & auidité de gain ont gardé lesdites especes legeres, soit pour en abuser, ou les exposer au poids avec auantage, ne s'estans mis en aucun deuoir de les faire conuertir pendant les delaiz, portez par lesdites précédentes Declarations, se preualent desormais de cette grace: Sadite Majesté veut & entend, que désà present lesdits particuliers qui feront conuertir des especes d'or legeres en Louis, payent les frais de la fonte & du brassage, ensemble du change, selon & ainsi qu'il sera réglé par la Cour des Monnoyes, conformément aux Ordonnances; & que ledit Reglement sera inferé en fin des imprimez qui seront publiez de ladite Declaration;

tion: Et pour empescher les abus qui se cōmettent és especes moulées faites par faux Monnoyeurs, lesquelles sont de plus bas tiltre que les vrayes Pistoles d'Espagne, & trouuées par les essays qui en ont esté faits iusques à la valeur de deux carats de perte, qui reuiennent à trente deux liures pour Marc; Sadite Majesté a fait tres-expresses defenses de les exposer à peine de confiscation, & des amendes & peines portées par ses precedentes Declarations; Veut qu'icelles especes moulées soient portées en ses Monnoyes pour y estre affinées & renduës au tiltre des bonnes Pistoles d'Espagne, & lesdites especes payées à ceux qui les y porteront selon leur iuste valeur, suiuant l'essay qui en sera fait en presence des Commissaires: Et quant aux Escus d'or rongnés & legers qui sont

de plus haut tiltre que lesdits Louis, veut qu'ils soient portez dans ledit temps & delay cy-dessus en sa Monnoye au marteau, pour y estre conuertis en especes d'Escus d'or de poids, suiuant les Ordonnances, & en la maniere accoustumée, & les Pistoles d'Italie legeres receuës esdites Monnoyes, & affinées au tiltre des bonnes Pistoles d'Espagne, pour estre conuerties en Louis avec lesdites Pistoles d'Espagne : Mandant à ladite Cour, que nonobstât le temps des vacations elle fasse lire, publier & registrer lesdites Lettres, & le contenu en icelles garder & obseruer ponctuellement, nonobstant oppositions ou appellations quelconques, desquelles & des differents qui pourront naistre en consequence, sadite Majesté a attribué toute Cour, Iurisdiction & cognoissance, & icel-

le interdite à tous autres Iuges, & à tous Baillifs & Seneschaux, Preuofts, Iuges, leurs Lieutenans, & tous autres ses Officiers qu'il appartiendra, y tenir la main. Requeste présentée à ladite Cour par les nommez Gilbert & simō Benoist, Charles de Raincy, & Iean le Breton, Changeurs de cette ville de Paris, tendant à ce qu'il pleût à ladite Cour regler ce qu'ils doiuent donner à ceux qui leur apporteront lesdites especes rongnées, tous déchets de fonte, change, alliage, brassage, & autres deduits, ainsi qu'il a esté fait de tout temps en pareilles occurréces, leur adiuger huiët sols pour once, & considerer qu'ils ont acheté leurs Offices de grande somme de deniers, qu'ils sont obligez de loüer chèrement des maisons & boutiques pour l'exercice de leursdits Estats, à payer vn grand fay-

fort au Maistre de la Monnoye de Paris, & qu'il n'est pas de mesme de leur Change, que de celuy qui a cy-deuant esté exercé en la Monnoye du Moulin, où l'on apportoit l'or leger, & l'on attendoit qu'il fust conuerty; au lieu qu'ils sont obligez à mesme temps que l'on leur apportera de l'or leger, de donner le change sans aucune dilation ny remise, & que pour ce faire il faut qu'ils ayent comptant de grandes sommes de deniers, qu'ils ne peuuent emprunter que sur la Place à gros interests, & ne peuuent rédre l'argét qu'ils aurót emprunté, qu'apres que toutes les especes aurót esté fonduës & conuerties, ainsi qu'il est porté par ladite Declaration, qu'il leur faudra entretenir nōbre de personnes cognoissans aux Monnoyes, afin de n'y estre point trompez: pour lesquelles rai-

sons l'on leur a donné dés l'an 1540.  
quatre deniers pour chacun Escu,  
valant lors quarante cinq sols, ce qui  
a esté augmenté en execution des  
Edicts qui ont esté depuis faits, en  
sorte que lors des derniers l'on leur a  
dōné 7. sols pour once. Autre Reque-  
ste de Louis de la Croix, Maistre &  
Fermier particulier de la Monnoye  
de ceste dite ville de Paris, tendant à  
mesmes fins que celles desdits Chan-  
geurs, & à ce que lesdits Changeurs  
soient tenus luy payer les déchetts de  
fonte de l'or qu'ils luy apporteront:  
Conclusions du Procureur General,  
auquel le tout a esté communiqué;  
Et veu les Edicts & Declarations des  
années 1554. & autres ensuiuantes,  
iusques & compris celui de 1614. &  
tout cōsideré. LA C O V R a ordonné  
& ordonne, que sur le reply desdites  
Lettres, sera mis qu'elles ont esté

leuës & registrées és Registres de la-  
dite Cour, ouy, & ce requerant le  
Procureur General du Roy en icel-  
le, & qu'elles seront leuës & publiées  
à son de trompe & cry public, & af-  
fiches mises és carrefours, & lieux  
publics & accoustumez de ceste vil-  
le de Paris, & copies collationnées  
par le Greffier de ladite Cour, par  
luy enuoyées par les Prouinces de ce  
Royaume, tant aux Generaux Pro-  
uinciaux des Monnoyes, qu'aux Iu-  
ges & Gardes d'icelles, Baillifs, Sene-  
chaux, Preuosts, & autres Iuges de ce-  
dit Royaume, pour estre pareillemēt  
leuës & publiées, & tenir la main à  
l'execution, & entretenemēt du con-  
tenu en ladite Declaration; lesquels  
seront tenus certifier la Cour de  
leurs diligences au mois, & confor-  
mément ausdites Lettres; qu'il sera  
travaillé incessamment au conuer-

rissement des Pistoles d'Espagne &  
 d'Italie en Louis de cent sols, dou-  
 bles, & quadruples, tant en la Mon-  
 noye du Marteau de ceste ville de  
 Paris, qu'en celle du Moulin; que de  
 tout l'or prouenant desdites especes,  
 il en sera conuertý le tiers en Louis  
 de cét sols, vn autre tiers en doubles,  
 & l'autre en quadruples, sans que  
 souz pretexte du conuertissement  
 desdites Pistoles d'Espagne & d'Ita-  
 lie en Louis, les Maistres desdites Mō-  
 noyes puissent employer les Escus  
 d'or legers, ny les autres especes d'or  
 du tiltre plus haut que vingt deux  
 carats, à faire desdites especes de  
 Louis, souz les peines portées par  
 les Ordonnances & Arrests de ladite  
 Cour: tiendront les Maistres desdi-  
 tes Monnoyes registres separez des  
 especes d'Italie, & en feront des fon-  
 tes separées; & au regard des Escus

d'or, & des autres especes legeres, & tout autre or de plus haut tiltre que vingt-deux carats, seront conuerties en Escus d'or en ladite Monnoye du Marteau, les Ouuriers & Mōnoyeurs de laquelle seront tenus de faire lesdits Escus, Louis, doubles, & quadruples de telle rondeur & perfection, que lesdites especes ne puissent estre rongnées, sous les peines portées par l'Arrest de ladite Cour. ORDONNE en outre que ledit Maistre de la Monnoye de Paris tiendra registre separé de tout l'or qui sera par luy fabriqué desdites especes, prouenant des lingots d'Orfeuerie, & de tout autre or que celuy desdites especes rōgnées, sous les peines portées par les Ordonnances. Et pour vne plus grande commodité des Subiets de sa Majesté, que conformément ausdites Lettres, outre les  
deux

deux Changes qui seront establis  
 esdites Monnoyes du Marteau & du  
 Moulin à Paris, il y aura quatre au-  
 tres Bureaux aux maisons des Chan-  
 geurs de ladite Ville, pour faire six  
 en tout, esquels six Bureaux seront  
 receuës toutes pieces d'or legeres, & à  
 l'instât cizaillées en presence de ceux  
 qui les y aurôt portées, lesquels serôt  
 aussi à l'instânt payez de la valeur en  
 autres especes d'Escus, Louis de cent  
 sols, doubles & quadruples, & au-  
 tres ayans cours par les Ordonnan-  
 ces, sans vser d'aucune remise. Pour  
 lequel Change, Affinage, Alliage,  
 delchet de Fonte & Brassage desdites  
 especes legeres, ladite Cour a par  
 prouisiõ, iusques audit iour premier  
 lanuier prochain, permis ausd. Cha-  
 geurs & Maistres des Mõnoyes de re-  
 tenir pour once dudit or leger, ainsi  
 par eux changé douze sols six de-


niers, & pour Marc & diminutions à proportion; laquelle diminution sera pareillement faite dans le commerce aux payemens qui seront faits en or leger, iusques aud.iour premier Ianuier; sauf apres ledit temps à faire tel Reglement que ladite Cour aduifera bon estre. A fait & fait inhibitions & defenses à routes personnes d'exposer ny receuoir ledit or leger à plus haut prix que suiuant le Tarif qui sera arresté en ladite Cour, & attaché à chacun desdits six Bureaux de Change, au lieu plus eminent, afin que chacun puisse voir la valeur desdites especes. A fait & fait inhibitions & defenses à tous Orfeures, Ioüalliers, Affineurs, & autres personnes de quelque estat & condition qu'elles soiét, de faire aucun fait de Change ou fonte d'especes, sur les peines portées par les Or-

donnances : Seront lesdits Maistres  
des Monnoyes & Changeurs, tenus  
faire de nouveau estalloner au Greffe  
de ladite Cour, les poids desquels ils  
se serviront en leursdits Changes, &  
iceux poids, ensemble les diminutiōs  
d'iceux faire marquer du poinçon de  
Fleur-de lys, qui est audit Greffe:  
tiendront Registre, duquel les fueil-  
lets seront cottez & paraphéz par le  
Commissaire à ce commis, dans le-  
quel ils seront tenus registrer toutes  
les especes qu'ils receuront, les prix  
d'icelles, & le prix qu'ils en auront  
donné, pour estre iceluy Registre  
veu, calculé & arresté en fin de cha-  
cune semaine. FAIT en la Cour des  
Monnoyes le vnziesme iour d'Octo-  
bre mil six cens quarante.

Signé, DELAISTRE.

L'an mil six cens quarante, le Samedi 13,  
iour d'Octobre, la Declaration du Roy cy-  
dessus, portant prolongation du terme du con-  
uertissement des especes d'or legeres en especes  
d'or de poids, & du decry desdites Monnoyes  
legeres, iusques au dernier Decembre 1640.  
a esté leuë & publiée à son de Trompe, & cry  
public aux Carrefours & autres lieux, tant or-  
dinares qu'extraordinaires de cette Ville &  
Fauxbourgs de Paris, en la presence de nous  
Iean Gerin premier Huiſſier en ladite Cour  
des Monnoyes, Iacques Blondel, & Michel Re-  
bours, auſſi Huiſſiers en icelle ſouſſignez,  
par Iean Iofſier Iuré Crieur en ladite Ville,  
Preuoſté & Vicomté de Paris; accompagné  
de trois Trompettes Commis de Pierre Gilbert,  
Gentian le Chable, & Noiret, Iurez Trom-  
pettes du Roy esdits lieux: Comme auſſi a  
esté ladite Declaration affichée par nous en  
tous les lieux accoustumez de ladite Ville &  
Fauxbourgs de Paris, à ce qu'aucun n'en  
pretende cause d'ignorance.

Signé Gerin, Blondel, & Rebours.



# ENSVIT LE PRIX

que les Maistres des Mon-  
noyes & Changeurs seront te-  
nus donner au Peuple, tous sa-  
laires de Change, Affinage dé-  
duits, des pieces qui ensuiuent.

*Escus d'or sol.*

Du Marc,	372. liures.
De l'Once,	46. l. 10. sols.
Du Gros,	5. l. 16. s. 8. deniers.
Du Denier,	1. l. 18. s. 10. d.
Du Grain,	1. s. 7. d.

*Pistoles d'Espagne.*

Du Marc,	357. liures 10. sols.
De l'Once,	44. l. 13. s. 9. d.
Du Gros,	5. l. 11. s. 8. d.
Du Denier,	1. l. 17. s. 2. d.
Du Grain,	1. s. 6. d.

# *Escus & Pistoles d'Italie.*

Du Marc,	348. liures 12. sols.
De l'Once,	43. l. ii. s. 6. d.
Du Gros,	5. l. 8. s. ii. d.
Du Denier,	1. l. 16. s. 3. d.
Du Grain,	1. s. 6. d.

*Fait & arresté en la Cour des Monnoyes  
le II. Octobre 1640.*

Collationné aux Originaux par moy Conseil-  
ler & Secrétaire du Roy, Maison & Cou-  
ronne de France, & des finances, Greffier  
en chef de la Cour des Monnoyes.

*Extrait du Priuilege du Roy.*

**P**AR Grace & Priuilege du Roy, il est permis à SEBASTIEN CRAMOISY Imprimeur ordinaire du Roy & de la Cour des Monnoyes, d'imprimer ou faire imprimer, vendre & debiter les Declarations du Roy, Cahier des nouvelles Espèces d'or nommées LOVIS; comme aussi le Tarif de la valeur du Marc d'icelles fait par ladite Cour: Et defenses faites à tous Libraires Imprimeurs & autres personnes de quelque qualifié & condition qu'elles soient, d'imprimer, vendre ny debiter lesdites Declarations & Tarif, sans le consentement dudit Cramoisy, sur les peines portées par ledit Priuilege. Donné à S. Germain en Laye le 3. iour d'Auril 1640. Signé LOVIS. Et plus bas, Par le Roy, SVBLET. Et seellé du grand seel sur simple queue de cire jaune.

1891